

INNES

34533/p



Digitized by the Internet Archive
in 2018 with funding from
Wellcome Library

<https://archive.org/details/b30348560>

DISSERTATIO MEDICA

INAUGURALIS,

DE

I L L E O :

QUAM

ANNUENTE SUMMO NUMINE,

EX AUCTORITATE

Amplissimi SENATUS ACADEMICI,

et nobilissimae FACULTATIS MEDICAE decreto;

PRO GRADU DOCTORATUS,

UMMISQUE IN MEDICINA HONORIBUS ET PRIVILEGIIS

RITE ET LEGITIME CONSEQUENDIS,

ERUDITORUM EXAMINI SUBJICIT

ROBERTUS INNES SCOTO-BRITANNUS.

Ad diem 15 Junii, hora locoque solitis.

EDINBURGI:

Apud HAMILTON, BALFOUR, et NEILL:

M,DCC,LIII.

VIRO INTEGERRIMO,

D. ALBERTO MUNRO,

AVUNCULO SUO HONORANDO,

IN VARIO ERUDITIONIS GENERE VERSATO,

NON MAGIS OB SUMMAM MORUM

INTEGRITATEM,

QUAM PIETATEM PLANE SINGULAREM

CONSPICUO ;

STUDIORUM SUORUM FAUTORI AMICISSIMO,

PROPTER INNUMERA IN SE SUOSQUE COLLATA

BENEFICIA,

AD ROGUM USQUE COLENDO :

THESES HASCE INAUGURALES,

GRATI ANIMI ET OBSERVANTIAE NON SIMULATAE

MONUMENTUM,

PONIT

ROBERTUS INNES.

DISSERTATIO MEDICA

DE ILEO.

DE ILEO verba facturus, clarioris doctrinae gratia, quaedam de intestinis et motu peristaltico breviter praemittere visum est.

DE INTESTINORUM SITU ET FABRICA.

Per INTESTINA anatomici vulgo intelligunt tubum longum et pene cylindricum inter laminae peritonaei contentum, qui variis gyris et flexionibus a dextro ventriculi orificio, seu pyloro, usque ad anum exporrigitur, ad esculenta et potulenta in ventriculo praeparata, in massam pultaceam mutata, recipiendum, ulterius elaborandum, in vasa lactea, et venas absorbentes transmittendum, faecesque separandum, et ad anum ducendum, destinatus.

Propter diversam intestinorum magnitudinem et crassitiem, in tenuia et crassa dividi solent; illa quidem a pyloro ortum ducunt,

A

et

et in principio coli, seu caeco, exitum inveniunt; haec autem incipientia, ubi terminant tenuia, ad imum abdomen five anum protrahuntur.

Intestina tenuia vulgo numerantur tria, et tribus insigniuntur nominibus, nempe, duodeni, jejuni, et ilei, sunt et totidem crassa, caecum, colon, et rectum. In intestinis tenuibus nullum datur signum, praecipue inter jejunum et ileum, quo una intestini portio ab altera distingui potest.

Duodenum, nomen a longitudine adeptum, a ventriculi fine incipit, apud ostium annulare pylori, inde undulatum, sed in univ-
ersum transversim, ad vesiculam felleis migrat; tum dextrorsum oblique descendit, denique a dextro ad sinistrum latus ascendens, antro-
sum oblique decurrit, et in jejunum termina-
tur. In intestinum duodenum, ductus choledochus et pancreaticus sese exonerant, bilem nempe et succum cavo ejus infundunt. Reliqua intestinorum tenuium pars, propter sedem incertam descriptionem non admittens, variis flexionibus, colo ambeunte cincta, abdomen inferius et pelvim replet. Intestina crassa, ut antea observatum fuit, tria etiam dicuntur, scil. caecum, colon et rectum.

Caecum

Caecum est faccus iste irregularis, globosus, infra ilei ingressionem, vel pone valvulam Tulpii extensus; ab hujus ima parte, dependet intestinulum parvum conicum, quod vulgo nomine *appendicis vermicularis* dignoscitur. Colon, omnium intestinorum amplissimum, tria habet ligamenta validissima, quibus contrahitur, et in cellulas ingentes dispecitur; in ileo dextro incipit, et renem ejusdem lateris ascendit, oblique sub hepate flexitur, et utrique visceri ope peritonaei connectitur; deinde ventriculo subjectum, decurrens ad lienem, porrigitur, tum super renem transit sinistrum; denique in pelvi flexu magno facto, intestinum rectum devenit, quod sine ullo gyro aut anfractu, ad ani extremitatem continuatur.

Ex variis tunicis intestina confecta sunt; harum extima a peritoneo producta est: inter hanc et tunicam muscularem invenitur substantia cellulosa a RUYSCH detecta, vulgo nomine *tunicae cellularis*. Secunda carnosae ex duabus fibrarum seriebus componitur, longitudinalium et annularium, quae posteriores ad angulos rectos priores secant. Tertia, vel ea quae vulgo vasculosa, nervosa, et glandulosa dicitur, ope siphonis anatomici, facile in habitum

bitum cellulosum fingi potest, cum vasis innumerabilibus, forte etiam glandulis, Peyrianis, ubique per ejus substantiam distributis. Pori, et ductus excretorii innumeri, super quartam tunicam villosam dictam sese ostendunt, qui patulis osculis in intestinorum cavitate, lympham et mucum exhalant, ad ingesta attenuanda et intestina lubricanda; sunt et vasa lactea et inhalantia, quae liquidissimum ex chylo absorbent: praeter haec, minores pori ubique per intestina reperiuntur, praecipue in crassis intestinis; nuperri-
mâ vero industriâ, in tenuibus quoque conspicui, et iisdem usibus cum aliis inserviunt: tunica haec amplissima caeteris longior, et undique in rugas innumeras semicirculares eminet, praecipue in intestinis tenuibus, valvulae conniventes nuncupantur in intestinorum contractione, ingestorum iter sistunt; hinc facilius chyli transitus in venas absorbentes et vasa lactea. Existimat celeberrimus MONRO *, hancce tunicam esse epidermidis continuationem, et non solum per intestina, sed etiam per omnia corporis vasa, continuatur idem integumentum.

Intestinorum vasa sunt, arteriae et venae meseraicae, arteria me enterica superior, su-
pra

* Vid. *Med. Essays*, vol. iv. art. xi.

pra emulgentes ex aorta egreditur, et intestinis praecipue tenuibus sanguinem praebet; inferior vero, ab ultimo tere aortae extremo egressa, ad intestina crassa potissimum abit; ex ambabus hisce arteriis rami emergunt, qui anastomofin satis mirabilem faciunt. Venae, sicut in omnibus visceribus chylopoësi intervenientibus, sensim per majores ramos, sese ad venam portarum recipiunt. Duodenum et intestinum rectum habent arte ias sibi proprias; duodenum ramum indiscriminatim a stomachica coronaria, pylorica, gastrica majori vel hepatica accipit, nec non ramusculos, ab hisce truncis, et a mesenterica superiore, quae omnes inter se communicant. Intestinum rectum, praeter ramos a mesenterica inferiore, arterias quoque accipit, ab haemorrhoidali interna.

Instruuntur intestina numerosis et exiguis nervorum filamentis, quae omnia vel plexibus intercostalibus, vel mesentericis originem trahunt.

DE MOTU PERISTALTICO.

Apud anatomicos constat, ut antea observatum fuit, intestina tunica musculosa muniri, duplici

duplice fibrarum ordine conflata, quarum aliae aliis subjiciuntur; fibrae prioris ordinis longitudinales sunt, posteriores vero instar annulorum dispositae, intestina ex omni parte cingunt, annulares seu orbiculares nuncupantur: harum contractione fibrarum absolvitur motus intestinorum peristalticus, scilicet longitudinalium contractione, abbreviatur fistula intestinalis; orbicularium vero arctatur atque constringitur; ita ut hâc vi mechanicâ ingestorum pars tenuior, fluidiorque felicius exsugatur vasorum lacteorum osculis, dum pars craffior et faeculentior ad podicem usque urgeatur, brevi tanquam inutilis rejicienda. Multum inter se dissentiunt auctores, quomodo motus peristalticus dictus perficiatur. Aliqui aiunt *, se, dum hanc rem operâ et industriâ exploravere, tantum observâsse, subsultum quendam tum arteriarum, tum tunicae intestinorum, seu motum tremulum, quem tamen non nisi ope microscopii percipere potuerunt. A praejudicata opinione et experimentis male institutis certe, in hancce sententiam incidit D. HAGUENOT; quoniam multis periculis, a viris praeclaris in viva animalia institutis, luculenter satis apparebat motus hicce peristalticus seu vermicularis. Ex-

istimant

* Vid. Histoire de l'Academ. Royal. ann. 1713. p. 470.

istimant vero alii, fibras circulares a partibus superioribus ad inferiores constringi, non subito et omnes simul, sed successive alii post alios, lento tamen gradu a pyloro usque ad anum. Continuaturo vero hocce impetu, si ad imum usque a summo, sine ullo obstaculo, vel levi motu quasi antiperistaltico pergeret contractio, quam, quaeso, proclivis esset chylosi succi, cum stercorebus confusi excretio? aut quis se immunem evadere a passione coeliaca, ad unicam horam polliceri potuit? Quoniam haec autem theoriae nostrae non bene favent, mihi nunc incumbit, quam breviter, methodum per quam motus iste perficitur, illustrare.

Supponamus tum, compressione diaphragmatis, juvante vermiculari ventriculi motu, protrusam aliquam massae cibariae partem ad pylorum accedere, ejusque resistantiam superare, in duodenum ferri; liber vero transitus, propter valvulas atque vim intestini contractilem, huic denegatus, nerveam intestini membranam irritando et vellicando, hanc ita afficiet, ut, propter commercium inter nervos et fibras carneas, ipsis novum contractionis motum impertiet; imminuta vero intestini cavitate, contenta alio recedere cogantur,

gantur, versus eum locum, ubi minorem invenient resistantiam, scil. in laxum inferius intestinum ; hinc talis intestini agentis portio, vermem refert quæ dum prorepat, una parte contracta, et hinc turgente, sequentem quietam adducit. Materia vero chylacea admissione bilis et succi pancreatici acrior redditur, aptior fit ad intestina stimulanda, et in contractiones fortiores deducenda ; non tamen existimare oportet hæc alternas contractiones et dilatationes, semper in iisdem limitibus earundem partium agentium versari, nec alios sibi terminos constituere : adfectis enim, vel infra vel supra, aliis intestinorum portionibus, absque ullo certo ordine, nunc huc, nunc illuc, hunc motum perficiunt, ubicunque aër vel cibus stimulum adinoverit : et cum pondus in tot flexionibus nihil conferat ad alimenti descensum, intestinum irritatum in statu naturali, reciproce, nunc sursum, nunc deorsum se evacuet, idque in bonum finem, tum ut omnia contenta, in intestinorum cavitate intime commisceantur, tum ut chylus in vasa lactea et venas absorbentes expeditius secedat : hinc it, redit contentum per eandem viam, modo non tam alte,

te, et eo usque, unde descendit, regreditur, sed sensim, pedetentimque, data via, succedit.

Ut confirmetur, et clarius elucescat haecce doctrina, liceat mihi historiam proferre ab excellentissimo *Werpero* apud PEYEROU M narratam, et sic ait : “ Misella mulier, quem et
“ ipse quoque praesens vidi, ex abdominis
“ sui latere sinistro, paulo supra inguen pro-
“ pendentem, gestat interaneorum magnam
“ portionem ; quippe duas, et quod excurrit
“ spithmas, longam, in qua, concoctionis
“ tempore, denudata deprehendimus, et ad-
“ mota quoque manu, exploravimus fibras,
“ modo superius, modo inferius, motum su-
“ um ordiri ; materiamque intus fluctuan-
“ tem sursum deorsumque agitari, absque
“ aegrotantis dolore aut torminibus.” Et
addit, “ Sed et in diversis brutorum vivis se-
“ ctionibus, quas variorum experimentorum
“ gratia crebro administramus, aliquoties
“ notavimus intestina abdomine dissecto apri-
“ cantia, sese vermium ritu motitara ; non
“ tantum a superioribus versus inferiores, sed
“ etiam, vice versa, quoque ab inferioribus
“ versus superiora.”

His jam de motu peristaltico praemissis et stabilitis, motus antiperistalticus facile intelli-

gitur. Si enim propter angustiam, obstructionem, compressionem, aut aliam quamcunque rationem, ulterius pergere non possit materies chylacea, oportet ut, inde regressu facto, ac motu intestini contractili, in adversam partem determinato, rursus ad stomachum unde profluxerat, reportetur.

DE I L E O.

ILEUS, seu passio iliaca, inter antiquos variis insignitur nominibus; ileus a quibusdam auctoribus dicitur, quia in intestino ileo residet plerumque morbi causa, vel a verbo Graeco, *ειλεω*, volvo, seu convolvo: in hoc enim morbo intestina saepe circumvolvi et complicari videntur; unde a Latinis volvulus nuncupatur. Aliis *χορδαψον*, ex eo, quod tumor aliquando circa umbilicum apparebat, qui chordam, veluti tensam et duriter contortam omnino representabat: praeterea a CELSO, *morbi intestini tenuioris* nomen huic inditum fuit. AURELIANO, *tormentum*; Barbaris vero, *miserere mei*, ob atrocissimos dolores, quibus vexantur aegri, merito quidem, commiseratione Dei hominumque digni, quique
 medicinae

medicinae auxilium magis implorare videantur, quam alii aliis morbis detenti.

Ileus recte definitur, dolor intestinorum acutissimus, alvi adstrictione stipatus, dum contenta et assumpta versus superiora propelluntur, per os brevi rejicienda.

Ineunte hoc morbo, adest alvi suppressio, dolore et borborygmis afficiuntur intestina, nausea et ructibus corripitur aeger: ingravescente morbo, quicquid cibi vel potus deglutitur, mox vomitu iterum, sub forma, colore et odore diversis, gradum revocat, stercoreis foetore saepe inquinatum, abdomen tumidum evadit, pulsus durus et contractus est, cum augmento doloris, summa sequitur virium prostratio, languent, delirant, et singultiant aegri, sudore frigido totum perfunditur corpus, urina supprimitur, vel quandoque turbulenta et putrida redditur, et, ut crediderunt nonnulli, alvi faeces, clysteres, suppositoria, &c. vomitu rejiciuntur. Sic refert * MATTHAEUS *de gradibus*, “ Puellam quan-
“ dam, annos natam duodecim, ileo labo-
“ rantem, postquam per triduum, non fo-
“ lum faeces, sed etiam clysteres injectos vo-
“ mitum rejecisset, tandem suppositorium
longum

* Vid. River. lib. ix. cap. ii. p. 153.

“ longum in anum immiffum, poft breve
“ tempus vomitu excreviffe. Cum vero,
“ deinde fuppoſitorium aliud ad coxam al-
“ ligaretur, illud etiam paulo poſt, ruptis
“ filis, furſum aſcendit ad ventriculum, id-
“ que aegra, cum parte fili appenſi, evomu-
“ it; et cum tertio, fuppoſitorium aliud qua-
“ tuor filis fortibus alligaretur, illud etiam
“ paulo poſt, filis ruptis, per os, cum parte
“ filorum, rejectum fuit. Tandem cum
“ medicus juberet, ut mater aliud fuppoſito-
“ rium admitteret, tanta violentia attractum
“ fuit, ut mater, ne ruſum raperetur, illud
“ extrahere coacta fuit.”

Quis, quae o, niſi credulus, et naturae ilia-
cae paſſionis ignarus, hiftoriae hujusmodi fidem
adhibere potuit. Oportet enim ad ileum per-
fectum conſtituendum, viam inteſtinorum eſſe
omnino praecluſam, et intercepto prorſus itine-
re, quaecunque ſupra obicem continentur,
per ſuperiora rejici debent. Dubitandum im-
primis, an materies faeculenta ullum regreſſum
inveniat per valvulam coli, ſi vero conceda-
mus, ut ſic ſe res habeat, ſi obſtructio vel
obex in inteſtinis tenuibus, ut plerumque, ſe-
dem habuerit, nulla ratione concipi poteſt,
quomodo, vel faeces, aut clyſteres, ultra lo-
cum

cum obstructum transgredi debent. Quum vero causa, ileum producens in intestino collo haeret, si concedatur, ut materies faeculenta, ab inverso intestinorum motu, valvulam, apud initium hujus intestini positam, vincere possit, haud omnino negandum est, quin omnes faeces inter obicem et valvulam contentae, sursum evadent vomitu rejiciendae. Vomitus quidem ille, qui vulgo in hoc morbo faeculenta dicitur, ni fallor, plerumque nihil aliud est, nisi cibus atque potus per totum morbi decursum assumpti, qui admissione solito majore bilis quantitate, absorptione tenuiorum partium, remora et calore loci, formam, colorem, et odorem inducunt faeculentam; et cum per superiora eliminantur, easdem fere ac faeces alvinae, qualitates sensibus nostris exhibent.

C A U S A E.

Morbi causae nunc ordinatim indagandae: quaecunque ergo alveum intestinale praeccludunt, vel saltem transitum ingestorum ad inferiora prohibent, pro causa hujus morbi proxima aestimanda sunt. A triplici vero fonte,

fonte, haec causa originem trahit, ab obstructione, compressione, et a nimia intestinorum constrictione.

Dissectione cadaverum ileo defunctorum constat, plurimas esse causas quae intestinas obstruere valeant; et imprimis faeces induratae et siccae. Quicquid ergo sanguinis calorem in vasis intestinalibus adaugere aptum erit, vel excrementorum descensum ad inferiora retardare, faeces indurando ileum remotè excitare possit. Ea quae sanguinis calorem adaugent, sunt alimenta calida, piperata, &c. exercitium immodicum, ira, gaudium immoderatum, bilis, perspirationis, solitarum evacuationum et excrementorum suppressio; his omnibus intenditur sanguinis motus; hinc ingestorum partes tenuiores ex intestinis avidissime hauriuntur, dum crassiores remanent, et intestina obturant. Haec autem quae descensum alimentorum praepediunt, sunt debilis intestinorum compages, bilis quantitatis defectu vel qualitate peccans, mucus solito spissior, et copia nimis parva, ab obstructione glandularum, quae in concava intestinorum superficie reperiuntur, a quibus adeo languet motus peristalticus, ut
faeces

faeces induratae evadant, et morbum iliacum producere queant.

Quod de faecibus induratis dictum est, pari ratione dici potest de corporibus quibusdam alienis in intestinorum cavitate haerentibus, quasi calculis, aut ceraforum vel prunorum nucleis, qui vires coctrices omnino eludunt, magna copia in quacunque intestinorum parte, potissimum in caeco, uti observationes practicae docent, accumulatis et retentis, atque ope muci intestinalis in globum compactis. Vermes etiam in fasciculos convoluti et agglomerati, tubo intestinali hospitantes, mole obstructionem pariunt, pondere nervos comprimunt. Osculis suis tunicam intestinorum internam erodunt et vellicant; hinc dolorem acutissimum, et affectum iliacum inducere valent. Tumores quoque schirrosi, a quacunque causa, intestinorum substantia progeniti, quum eorum cavitatem occludunt, tanquam causae hujus morbi proximae considerari debent.

Nonne intus susceptio aut intestinorum invaginatio, nempe, cum pars intestini superior, in proximè inferiorem nimis dilatatam ingreditur, vel vice versa; potius pro effectu quam causa, quae hunc morbum antecedit, habenda

habenda est? hoc inter alia suadet, quod talis invaginatio et intestini intus susceptio, inveniat etiam post mortem in cadaveribus eorum qui malo iliaco non laborârunt, et ad extremum usque halitum, nunquam de dolore aut alvi obstructione conquesti sunt; judicandum ergo, ut aliae causae concurrere debent ad ileum producendum: supponamus tum, vel a tumore schirroso, aut alia quacunque causa, aliquam intestini partem adeo obturatam, ut contenta a superioribus versus inferiora iter facere nequeant; facile intelligitur quomodo pars superior ab inferiore hauriatur; materies enim chylacea continuo a ventriculo in intestina propulsa, tandem supra obicem tanta copia accumulatur, ut sensim sensimque pondere suo et gravitate partem intestini obstructam superne deorsum protrudat. Ab alio quoque fonte, optime deducitur haec invaginatio; si una pars intestini vehementer constringitur, et pars proxima flatu distenditur, portio constricta facile in eam flatu distentam protrudi potest; huic autem sententiae ne gratis subscripsisse videar, produco in medium, historiam a clarissimo PEYERO narratam, de sectione feminae ileo extinctae, quae ita se habet: “ * Pat-

tefacto

* Vide Peyer. parerg. anat. cap. ix. p. 46.

“ tefacto abdomine, ileum alicubi plane con-
“ strictum, atque, veluti injecto laqueo,
“ strangulatum vidimus, nimirum portio e-
“ jus quatuor digitos transversos longa, pluri-
“ mum vero contracta ac angustata, intra
“ proximae portionis superioris cavitatem
“ prorsus abscondita latebat.”

Obstructione autem facta a causis suprà-
dictis, intestinorum tunicae magnam patien-
tur distentionem, intestina verò nervis ditis-
sima distendi nequeunt, quin nervi quibus
instruuntur nimium distrahantur ; in hac ergo
proxima et immediata consistit causa doloris :
causa eadem comprimuntur vasa anguifera,
ea praecipuè, quae sanguinem ad cor reve-
hunt, venosa intellige, ob laxiorem textu-
ram, causis comprimentibus facilius cedunt ;
pressione ergo permanente, sistitur omnino,
ex arteriarum finibus, exitus humoris vitalis
intestinorum substantiam hac in parte per-
lustrantis ; sanguis verò continuo a corde pro-
pulsus, contra vasa obstructa, tanta vehemen-
tia ruit, ut, iis tandem disruptis, humor hic-
ce in substantiam eorum effunditur ; stag-
natione loco calido putrescere incipiet, et
in pus converti, quod sua acrimonia intesti-
norum tunicas vellicabit et exedet ; unde fixus

atque faevus inducitur dolor. Inflammatio verò cum suis sequelis in tali casu magis pro effectu quam causa aestimanda est.

Secundo ; intestina duplici modo comprimì possunt, primo cum naturalem mutant situm, et quae antea in abdominis cavo libere movebant, nunc in angusto loco reposita strangulantur, uti contingit in herniis umbilici, inguinum, scroti et femorum : duplicatum enim semper est intestinum, et saepe duro excremento plenum, ex abdominis claustro dilapsum, peritoneo autem contentum ; adeo saepe ejus moles augetur, ut pristinum locum repetere nequeat, atque ibi incarcerationum transitum omnem contentorum plane impedit (observavit HOFFMAN. quod haec causa in foeminis periculosior sit) : “ * In foemi-
“ nis res est majoris periculi, cum processus
“ ibi sunt angustiores, et difficilius prolapsa
“ intestini portio reponatur : et licet in non-
“ nullarum inguine tam exiguus tumor, ut
“ vix fabam aequet, protrudatur, tamen fae-
“ vissimam hanc passionem invehere potest.

Tumores etiam in partibus intestinis adjacentibus geniti, pancreate, nempe, et mesenterio,

* Vid. Hoffman. vol. 1. sect. 2. cap. 4. p. 276.

terio, ita quidem constituti, ut intestina comprimunt, passionem iliacam producere valent.

Tertio, Ea quae strictionem et coarctationem intestinis ipsis inferre possunt, sunt humores omnes acres, intestina vellicantes, ut humor gastricus, bilis, succus pancreaticus vitiati, ichor acris, pus ex ulcere ibi haerente, a praevia inflammatione, ut in dysentericis saepe accidit, fructus horaei, acres, austeri, medicamenta acria, purgantia, emetica, venena: ita CAELIUS AURELIANUS, dum de hoc acuto tormento scribit, inter causas refert venenum cibo vel potu assumptum. Haec omnia eorum acrimonia intestina stimulant, vellicant, spasmodice contrahunt, alveum intestinale penitus constringunt, ac proinde hunc morbum producunt.

SYMPTOMATA ET SIGNA DIAGNOSTICA.

Se prodit hicce morbus modo sequente. Ileus incipiens, difficile admodum a dolore colico distingui potest, quoniam secum multa habet signa communia; haec autem manifeste demonstrant, ileum confirmatum adesse, scil. dolor ingens et acutissimus, modo supra, modo infra umbilicum, (magna enim

enim ex parte circa ejus regionem haeret) cum pulsu celeri, duro et contracto, tumor eminens et renitens, ad chordae tensae similitudinem in abdomine tactu percipiatur, inflatio, et vehemens totius abdominis distentio, pertinax alvi adstrictio, intestinorum murmura et flatus copiosissimi, ructus inanes, nil solaminis praebentes, nausea intolerabilis, vomitus, pituitae, bilis, et materiae faeculentae, stercorei similis; rarissime enim faeces rejiciuntur: singultus, delirium, anus aliquando contractus, supprimitur urina; denique accedunt sudor frigidus, copiosus, extremorum frigiditas, cordis tremor, animi deliquium, mors.

Unde proveniant haec symptomata, nunc videamus.

Dolor ingens et acutissimus oritur, a distensione vasculorum minimorum, atque impetu fluidi a tergo urgentis, contra eum locum ubi latet morbi causa; fibrillas autem nervosas, copiose per haec vasa dispersas, multum inde distrahi necesse est; unde acerbissimus excitatur dolor.

Practicis observatur, quod in omnibus intestinorum inflammationibus, pulsus plerumque durus et contractus, non vero plenus sentitur; pulsus durus et contractus oritur a corde

et

et simul universo vasorum systemate, ob vehementem intestinorum dolorem et nauseam, spasmodice affectis ; inde enim cor et arteriae haud patiuntur se tantum a sanguine irruente dilatari, ac in sanitate, quando cor minus irritabile majorem copiam sanguinis tempore suae diastoles recipit, hancque dein systole sua expellit in arterias, nulla constrictione spasmodice affectas. Celer, quia imprimis sanguis per pauciora vasa transire coactus est. Secundo, A dolore semper intenditur pulsus velocitas, etiam in illis morbis, qui ex sua natura minime in febrem vergunt ; ut in podagra, lue venerea, &c. patet. Dum enim torquet talis dolor acerbus, fere semper aliqua febris adest. Dixit et ipse HIPPOCRATES, “ ex vehementibus doloribus obortae “ febres diuturnae.”

Tumor eminens et renitens pendet forte ab intestinorum convolutione ; an vero pars superior in inferiorem, vel vicissim, inferior in superiorem ingressa sit, nullo quidem signo dignosci potest.

Inflatio, et abdominis distensio, proveniunt ab impedito ingestorum descensu per inferiora, dum satis expedite sursum non transeunt ; intestinis ergo accumulatur, abdomenque

menque distendunt ; praeterea aër, qui magna copia cum potu et cibo deglutitur, spasmis nunc sistitur, calore loci rarefactus, se expandit, et distensionem auget.

Pertinax alvi adstrictio. Afferit GALENUS, * morbo jam confirmato, hoc proprium et inseparabile hujus affectus signum esse, nihil per inferiora descendere ; alveo enim intestinali occluso, omnia supra obicem contenta per superiora eliminantur.

Intestinorum murmura et flatus copiosissimi ; flatus per ductus intestinalis ambages discurrere probant, vagi intestinorum strepitus et borborygmi, per liquida in eorum cava inclusa, passim excurrentes nunc has nunc illas elatere suo partes distendunt.

Ructus inanes. Aër claustris liberatus, transitum per superiora inveniens, cum sono et impetu per oesophagum et os foras exilit ; hinc ructus, causa vero eadem manente, nil fere solaminis praebent.

Nausea intolerabilis, vomitus, &c. Ineunte morbo, oriuntur haec symptomata a nervorum sympathia, nempe, dolore imo abdomine haerente. Ingravescente autem, omnia contenta ab inverso intestinorum motu sursum trudentur, quae mole et acrimonia

ventriculorum

* Vid. comment. in aph. Hippoc. § vii.

ventriculum vellicant, irritant, et in contractiones leviores trahunt, hinc nausea, stimuli vero augmento, hoc viscus in spasmos violentiores deducitur, et omnia sub hoc titulo recensita vomitu immani ejiciuntur.

Ani constrictio et urinae suppressio ab eodem fonte originem ferre videntur, scilicet ab irritatione et nervorum sympathia; forte etiam sanguis per intestina tenuia, quae in hoc morbo caeteris frequentius afficiuntur, difficulter circuitum obiens, per vias liberiores deflectere debet, nempe per binas emulgentes, sanguinem ad renes asportantes; ad has ergo arterias, sanguinis portio, quae iter consuetum pergere non possit, transfertur, quod fieri nequit, quin augeatur copia sanguinis renes naturaliter perlustrantis; hic, sanguis nimia copia accumulatus obstructionem et inflammationem producit; nemini igitur mirum, si in ileo nonnunquam contingat urinae suppressio.

Morbo ulterius provento, oritur singultus et delirium a nervis affectis.

Morituris vero, accedunt cordis tremor et extremorum frigus: pendet cordis tremor ab irregulari influxu spirituum nervorum in ejus substantiam; et cum musculus iste non
valet

valet sanguinem in extrema vasa propellere, deficit ibi vividus ille motus et attritus inter solida et fluida, a quo, magna ex parte, pendet calor corporis nostri; hinc extremorum frigiditas, denique animi deliquium et mors tragoediam claudunt.

Quum vero non solum pertineat ad medicum morbum praesentem dignoscere, sed etiam in causam, a qua pendet, quamvis difficile admodum, inquirere, ut felicem perficiat curationem; pauca de causarum signis expromere licet.

Si faeces induratae in causa sint, cognoscitur, praegressa et pertinaci alvi obstructione, absentia doloris et febris in morbi initio, naturali alvi pigritie, equitatione nimia, vita sedentaria, immodico corporis exercitio, moerore et animi sollicitudine, quibus omnibus, jam ante ileum, alvus vel retardata vel cohibita fuerat.

Cum a deglutitis corporibus quibusdam alienis, dignoscitur vel aegrorum vel adstantium relatu.

Vermes in intestinis hospitantes agglomeratos et ibi congestos suspicandum est, si aegri alias lumbricis saepe infestantur, si vermes ante excreti erant, aut usu remediorum per morbi

morbi decursum excernuntur, si cruditatibus acidis obnoxii sunt, vel ructus acidos morbi ipso tempore emittant.

Si a schirro oritur, tactu aliquando explorari potest; in ipso enim intestino recto, tumores hujusmodi reperiuntur, et digito in anum immisso, tactu facile percipi possunt. Deprehenditur etiam a duritie praecedente in loco affecto, gravitate, distractione continua, nec non a schirris interim in aliis corporis partibus evidenter sese exhibentibus.

Intus susceptio plerumque nullis certis signis cognoscitur; aliquando autem instar chordae tensae in abdominis regione percipitur, an vero pars superior in inferiorem, vel vicissim, nullo certo indicio dignosci potest.

Si ileus ab inflammatione inducitur, ex morbi vehementia, febre acuta continua, siti ingenti, calore summo, dolore in parte affecta igneo, vomitu bilioso, et linguae ficitate cognoscitur.

Cum a hernia vel intestinorum prolapsu, causa patet.

Si ab aliqua acri intestinis haerente, se manifestabit a diris et saevis convulsionibus praegressis, etiam ab ingestis acribus, et venenis brevi antea assumptis.

D

P R O G N O-

P R O G N O S I S.

Signa, quibus morbi eventus, jam determinandus, illustrare progredimur.

Quoniam ileus inter morbos acutissimos merito annumeratur, et diris stipatur symptomatibus, intra enim paucos dies aegri per saepe e medio tolluntur, sequitur hunc affectum periculi plenum, imo, et saepe funestum.

Periculum magis vel minus est, pro diversitate causae, et morbi vario decursu et incremento.

Si ab induratis faecibus, deglutitis cerasorum nucleis, aliisque duris corporibus, lumbricis agglomeratis, hernia intestinali, levi convulsione, &c. originem ducit, spes multum salutis effulget, saltem in initio medelam facilius accipit.

Cum inflammatio se praesentem ostendit, ni apta methodo fraenatur sanguinis impetus, intestinorum tunicae, plerumque abscessu vel gangraena corripiantur, quae signis cognoscitur sequentibus, repentina nempe et subita doloris cessatione, sine causa evidente, pulsu debili et celeri, cum magno virium prostratu, animae et oris foetore. Cum autem hujusmodi vitia, ex se lethalia sint, praesertim in partibus

partibus internis, quibus remedia convenientia applicari nequeunt, ileum prorsus insanabilem, et mortem in limine adesse proclamant.

Si schirrus aut tumores hujusmodi hunc morbum inducunt, sequitur ileum omnino immedicabilem: impossibile enim est sat cito causam auferre.

Intus susceptio, quòd latet saepissime causa, neque facile detegenda, difficillimum ergo ullam certam facere prognosin, si vero adsit, quum intestina invaginata non facile in pristinum et naturalem situm restitui possunt, praecipue si pars superior inferiorem ingressa sit, multo periculo versatur aeger.

Cum a venenis assumptis, nisi propriis remediis in initio a corpore eliminantur, diras plerumque ludunt tragoedias, et citissime mortem inducunt.

Signa prognostica, quae a morbi decursu proveniunt, e bonis practicis petenda sunt; inter quos primarius est magnus HIPPOCRATES, summa in arte nostra magister, qui haec habet.

“ * Cum ileosis interceptio est urinae, cita mors venit.” Impedita enim urinae secretionem,

* Hippocrat. coac. praenot.

tione, in cerebrum transfertur hoc fluidum, et simul cum ileo aegrum cito necabit.

“ * Tenuioris intestini morbo laborantibus, surditas malum.” Denotat enim, ut spiritus animales ad organum auditûs transmitti nequeant, neque valeant suo munere fungi; itaque malum tum cerebro communicari, cerebro autem turbato, prosternuntur aegri vires; et non solum organa auditûs, sed etiam fere omnes aliae functiones fatiscunt.

“ † Ab ileo, vomitus, singultus, convulsio, aut delirium, malum.” Si vomitus assumptorum, instar materiae faeculentae contingat, signum fere semper exitiale, praesertim, si morbi causa in imo abdomine lateat; arguit enim motum antiperistalticum verum adesse, convulsiones validas in intestinis et profundas haerentes. Singultus notat superius ventriculi orificium, et diaphragma a magna contentorum acrimonia, ex nervorum irritatione convelli. Convulsio et delirium indicant cerebrum valde turbatum, et eventum praedicunt satis periculosum.

Si

* Hippocrat in coac. praenot. § 2. text. 478.

† Hippoc. aph. 10. § vii.

Si supervenerit alvi fluxus, cum omnium symptomatum remissione, facilisque fit cibi potusve per inferiora descensus, bonum ; haec enim spem salutis aegro promittunt.

METHODUS MEDENDI.

Optime monuit HIPPOCRATES: “ * Si
“ unquam aliquis in ullo morbo utilitatem at-
“ tulit, eum justo tempore attulisse necesse
“ est :” quamobrem hominum commiseratio,
et medicinae auxilium, in nullo affectu ma-
gis implorari videntur, quam in morbo hoc
gravi et periculoso. Quemadmodum vero
ileus diversas et multiplices agnoscit causas,
pro earum diversitate, curatio variari oportet,
et hoc ordine quam paucis verbis percurram.

Si ab obstructione oritur morbus, indica-
tio erit, ad referendam et aperiendam angu-
statam intestini cavitatem, quod fit, ejus ca-
pacitatem augendo, et materiem occluden-
tem resolvendo et expellendo.

Raro accidit ileus sine inflammatione per
morbi decursum superveniente, quamvis ab
alio fonte originem suam duxisset ; quare hoc
symptoma imprimis nostram attentionem
immediate

* Lib. de morbis,

immediate postulat ; sanguinis ergo appulsus ad partem, nondum vel jam inflammata, praepeditur, et optime tollitur venaesectionis ope, quae larga manu celebranda, imo ad animi deliquium, et quamdiu ferre possunt aegri vires, pro re nata repetenda, donec pulsus plenior et mollior evadat. Enemata blanda, diluentia, refrigerantia saepissime injicienda, quae conflari possunt ex fol. malv. bimalv. pariet. alth. mercurial. flor. melilot. sambuc. &c. cum s. q. aq. coctis, addendo unicuique lib. decoct. ol. oliv. unc. 6 vel 4. forma clysmatis administranda. Cataplasmata ex residua ejusdem decocti contusa, et in massam pultaceam redacta, propria forma externo abdomini applicata ; loco vero hujus cataplasmatum, pellis agni seu vituli, recens mactati, fotu suo bonos praestabit effectus. Ad dolorem autem, focium inflammationis inseparabilem, compescendum et mitigandum, profunt anodyna et narcotica, secundum medici sagacitatem propinata. Quoniam aegri plerumque assiduis vomendi conatibus vexantur, potus debet esse ejusmodi qui maxime ventriculo gratus, saepe sed parva copia haustus, ex sero lactis, aqua cum pane tosto, aqua hordeacea, addito limonum succo, rob. ribes.

ribes. sambuc. uti vult aeger ; in usu horum persistendum est, donec morbus perfecte solutus : interim ab omni cibo abstineat, quum alimentum exhibitum, nullum solatium aegrotanti afferat, non enim in nutritionem cedit sed plane corrumpitur, et a ventriculo in intestina prolabens, cum contentis permiscetur atque vomitum auget. Quoad purgantia in intestinorum inflammatione, non nisi admodum lenia, et in parva dosi propinanda ; ea quae hunc scopum melius attingunt sunt infusiones cassiae tamarindorum cum manna, syrupus rosarum pallidarum, violarum, &c. cave tamen ne nimis properè et saevientibus symptomatibus exhibeantur.

In initio autem morbi, ni methodo antiphlogistica fraenatur sanguinis impetus, inflammatio saepe in abscessum abit, eo disrupto, pus in intestinorum cavitatem se evacuat, ulcere facto, ea remedia, ulceribus curandis convenientia, detergentia nimirum, exsiccantia, consolidantia praescribenda sunt, quae usque in aegri sanitatem continuari debent.

Si schirrus in ipso intestino genitus ileum produxerit, nullam fere medelam accipit ; tumor enim hujusmodi partibus externis vim medicamentorum plerumque omnino eludit :

quid

quid sperandum ergo, quando interne et occulte intestinorum substantia latet? ad protrahendam vero aegri vitam, utatur potu et victu lenissimo ex pulli jusculo, decoctis, farinosis, &c. omnia acria stimulantia vitanda ne in cancrum degenerat schirrus. Sin forte jam adest vel jam jam imminet cancer, proh dolor, immedicabile malum; ad symptomata autem levanda, dum perstat vita, remedia anodyna blandissima propinari debent.

Si ab intus susceptione seu volvulo contingat, curatio celebranda, evolvendo intestini convoluti portionem. Hic labor, hoc opus est, nullo certo indicio enim dignosci potest, an intestinum superne deorsum hauriatur vel vicissim; quamobrem, minus rectam existimamus methodum eorum, qui globulos plumbeos adhibent, nec non aliquot libros argenti vivi deglutiri commendant, omnibus autem supradictis (ubi de inflammatione agitur) incassum tentatis, melius est anceps quam nullum tentare remedium, praecipue in casu desperato; argentum vivum ergo reliquis anteponendum ob mobilitatem et pondus suum, nec facile motui intestinorum antiperistaltico obtemperans, votis forte respondebit, si ab inferioribus ad superiora
factus

factus sit tunicarum intestinalium ingressus, si secus, hoc est, si a superioribus ad inferiora intestina invaginata fuerint, morbum necessario augebit. Quare alii commendant remedium ab HIPPOCRATE * propositum; ut follis fabrilis ano adaptetur, † et eo flatus in ventrem immittatur, ad intestina dilatanda, et obstructionem removendam, postmodum clyster emolliens injiciatur, ut faeces educantur. CAELIUS AURELIANUS ‡ hanc methodum improbat, ex eo, quod ventus a folle immixtus frigiditate sua multum laedere potest. RIVERIUS ad hoc incommodum evitandum, jussit follem juxta ignem aëre calido impleri. Cognita vero aëris natura et praesenti intestinorum conditione, unicuique patebit, hoc remedium violentum et valde periculosum atque pro ultimo conamine tentandum esse.

Cum faeces induratae et siccae, ingesta cerarum nuclei, &c. huic affectui ortum dederint, venaesectio imprimis locum tenet; quae iteranda frequentius aut rarius, pro viribus et aegri aetate, emollientia et relax-

E antia

* Hipp. lib. 3. § 5. de morbis.

† Vid. River. lib. 9. c. 2.

‡ Cap. 17. lib. 3. de morbis acutis.

antia remedia, interna et externa, erunt usurpanda: inter externa recensentur, balneum tepidum, fots, cataplasmata, &c. ex herbis emollientibus parata. Enemata mucilaginosae et oleosae injicienda, quae intestina valde deliniunt atque lubricant, ex decoctis althaeae, malvae, mellilot. sem. lin. et foenugrec. vel ex oleo communi solo, ad lib. i. nec non decocto capitis et intestinorum vervecis, aliaque id genus; post usum vero remediorum emollientium per anum et os assumptorum, cathartica et enemata purgantia excrementorum exclusionem magnopere juvabunt; ait vero HIPPOCRATES (quae purgare volueris fluida facere oportet) sic nempe excrementa duriora, in intestinis haerentia et veluti incarcerata, facilius cedunt. Hoc autem incommodo laborant purgantia omnia, liquida forma exhibita, mole scilicet ventriculum adeo irritant, qui jam nausea laborat, ut non citius deglutita, quam statim vomitu gradum revocant. Huic scopo melius satisficient, pil. aloët. cum grano opii, nec non granis v. vel vi. calomel. scrupulo pil. admistis; repetatur scrupulum pil. omni trihorio, pro re nata: quum vero expectanda est cathartici operatio, injiciatur clyisma qualitate stimulante pollens, quod

quod conflare possit ex infusione fennae, addendo colatur. aliquot uncias oxymel. scillit. et pauxillum salis glauberi, dum interim in balneum tepidum descendat aeger. A medico praeclaro in academia nostra hanc methodum bono cum successu usurpatam vidi: si morbus huic non cedat, non praetermittendum efficax illud et potentissimum alvo cienda remedium, cujus fidem ex experientia faciunt medici practici, id est ut imitantur aegri pedes in vas aqua frigida plenum, vel ut deambulet pedibus nudis supra pavementum frigidum, dum subito ictu e manu adstantis poculum aquae frigidae super nudum corpus projicitur, et repetatur inspersio, uti postulat usus. Hoc remedium cutis poros obturando perspirationem solitam intercipiet, unde magis humectantur viscera interiora; vel propter motum convulsivum, quem toto systemati nervoso conciliat, spiritus animales magis commoti et agitati, intestina in motus constrictivos fortiores deducunt; unde faecum exclusio plerumque sequitur statim: cavendum tamen ne perperam et intempestive tale remedium usurpetur, sic enim aeger incidet in scyllam, cupiens vitare charybdin. Idem medendi
modus

us valet cum a vermibus agglomeratis oritur passio iliaca ; post morbum fugatum tamen propinanda sunt ea quae ad vermes necandos et expellendos apta.

Secundo, Quando a compressione oritur morbus, omni ope enitendum causam comprimentem auferre.

Si igitur herniae, aut intestinorum prolapsus, ileum pariunt, praecipua cura debet esse, ut intestina elapsa in pristinum situm reponantur, quod fiet blanda et prudenti manu chirurgi. Si ab inflammatione impeditur ingressus, ad hoc facilius praestandum, venaesectio instituenda, quae in omni inflammatione, omnibus aliis praecellit remediis. Clysmata emollientia relaxantia injicienda, fots abdomine externo applicandi, et reductio iterum tentanda ; quod si gangraenae metus, vel intestinum adeo tumefactum sit, ut absque chirurgica operatione reduci nequeat, tunc protinus celebranda, cujus operationis methodum chirurgi practici docent.

Si a schirro intestina exterius comprimente, eandem ac schirrus aliarum partium internarum curandi methodum postulat ; ideoque aperientia omnia usurpanda ; hic aquae marinae usus, si aliqua spes curationis affulget, aliis

aliis remediis anteponeendus. In historia a Doctore RUSSEL narrata, de viro generoso, qui ileo imperfecto laboravit, a tumore generis supra memorati, qui intestino infra lienis regionem adhaerebat; brevi autem decessit, omnis enim spes auxiliandi sublata fuit, priusquam medicus de bonis hujus remedii effectibus excogitavit, et haec verba facit: “ * Jam autem, si eo tempore, pariter ut nunc, marinae aquae usum perspexissem, inde forsan aliquod spei affulisset, non enim aliud quoddam medicamentum novi, quo melius quid discutitur, quam marina aqua interne sumpta, nec quod supra dicti morbi curatione magis accommodum videtur; in eo autem casu per se dari oporteret, ut fervaretur alvus libera; idque prius fieri deberet, quam obstructio sese penitus ibi confirmâisset: his etiam et illud commodi accedit, quod et digestionis et chylicationi marina aqua prodest.

Tertio, Si coarctantur et constringuntur intestina ab acri materia, eorum tunicas erodente et vellicante; remedia emollientia, diluentia, oleosa, mucilaginoso, in usum vocari debent, ea, nempe, quae particulas a-

cres

* Vide Russel de usu aquae marinae, p. 40.

cres involvunt, et quasi in vagina includunt, non neglectis in initio venaesectionibus, et sub finem morbi, purgantia blanda saepe, et parva dosi cum opiatīs permistis repetita. Pro diversitate autem acrimoniae, medicamenta singulis speciebus contraria, eligenda sunt.

Si a convulsione fibrarum intestinalium, seu inordinato spirituum influxu, uti in morbo hysterico aliquando accidit, conveniunt ea remedia quae morbum primum auferre valeant.

Post morbum pene fugatum, quamvis aegri avidē cibum appetunt, caute tamen adhibendus est; in genere sit facilis digestionis, et talis qui facile in chylum converti possit, atque nutrimentum leve praebeat, non faeces multas nec duras relinquens. Potum habeat ex fero lactis recens factō ne aceſcat, jure carniū leni, decocto hordeaceo, et sic porro.

F I N I S.

THE NEW YORK PUBLIC LIBRARY
ASTOR LENOX TILDEN FOUNDATION

505 N. 5TH ST. NEW YORK, N. Y.

THE NEW YORK PUBLIC LIBRARY
ASTOR LENOX TILDEN FOUNDATION
505 N. 5TH ST. NEW YORK, N. Y.

